

ANIJ EJ BŌK EBEL AK JAB KEIN

Kōttōpar ko an katak in:

- Kwaļok bwe jerowiwī an Adam ej etal ñan aolep armej.
- Kwaļok bwe armej re maroñ kepaak Anij ilo wāween an Anij ba wōt.
- Kwaļok bwe armej rej aikuj tōmak Anij bwe ren kabuñbūruon.
- Kwaļok bwe e jab emman aolep kilen kabuñ.

Melele ko relap ilo katak in:

- Jen lo bwe jej aolep ri jerowiwī im ekkar bwe jen mej.
- Jen lo bwe ejjeļok ad maroñ ñan lomooren kōj make.
- Jen lo bwe jej aikuj tōmak men ko Anij ej ba.
- Jen lo bwe ej aikuj wor katōrļok bōtōktōk ñan kōļļā oņean jerowiwī ko ad.

Ilo tōre in jej katak kōn plan eo an Anij ñan lomooren armej. Bwe en emman ad melele kōn plan ak karōk in, jej aikuj juon foundeson, ak juon pādpād, e pen. Mōttan foundesōn in ej kadmakin Anij im kadmakin jerowiwī. Ñe e bōd am melele kōn kadmakin Anij im jerowiwī ko am, enaaj bōd am melele kōn wāween bōk lomoor.

Kōn an Adam kōmman juon wōt jerowiwī- JUON WŌT JEROWIWI- ear jepel jān Anij im ear ejjeļok men ear maroñ kōmmane bwe en erre im wānōk. Etke armej rej lōmņak bwe renaaj wānōk im etal ñan lañ kōn aer make tiljek āinwōt ke emōj aer jerowiwī e nañin bwijin katen jān Adam? Kiiō jenaaj katak kōn ro nejin Adam im Iv. Ewi wāween aer bōk lomoor?

1. Kein im Ebel raar ļotak tu likin jikin kallib in Iden.

* **Armej rej ri jerowiwī. Ej aikuj Anij bwe e jab maroñ make lomooren e.**



Jenesis 4:1,2 Im leo ear jelā Iv lio pāleen, im ear etta im keotak Kein, im ba, “Iar bōk leo jān Jeova.” Im ear bar keotak Ebel, jatin. Im Ebel ri lale sip, a Kein ri kallib.

Kōn an Adam im Iv kar jerowiwī, Anij ear kadiwōjļok er jān jikin kallib in Iden.


- Kein im Ebel raar jab ļotak ilo jikin kallib eo.
- Kein im Ebel raar ri jerowiwī jān ien aer ļotak kōnke jemaer, Adam, ear juon ri jerowiwī.

Eļañne Adam ear jab jerowiwī, Kein im Ebel renaaj kar ļotak im weppān im renaaj kar maroñ in jelā, yokwe, im pokake Anij. Bōtab, raar ļotak iumwin kajoer eo an Setan. Raar jab pād ilo jikin kallib eo. Raar maroñ deļoñ ilo jikin kallib eo im mōñā jān wōjke in mour ke? Jaab. Enjeļ ro raar bōbrae aer deļoñ. Raar jepel jān Anij āinwōt Adam im Iv.

Adam ear jemān Kein im Ebel, im ej jemadwōj aolep. Kōn an kar jerowiwī, aolep ro re ļotak ilo laļ in

rej ri jerowiwī.

Bōlen e pen an armej lōmṇak bwe rej ri jerowiwī jān iien lotak. Ak lōmṇak kōn ajri jidik.



- Eṃōj ke aṃ lo juon niñniñ kwaḷok an illu?
- Etke jej aikuḷ katakin ajri bwe ren jouj im bwe ren pokake?
- Eṃōj ke aṃ lo juon ajri jidik kōṇaan kōṃṃan ankilaan im jab ankilaan jemān ak jinen?
- Ewor ke niñniñ me re mej? Eḷañne re jab ri jerowiwī, re jab maroñ mej.



Rom 5:19 Bwe āinwōt kōn kipiliia an juon armej, elōñ rej ri jerowiwī, barāinwōt kōn kipiliie an juon elōñ renaaj ri wānōk.

Eoon in ej kwaḷok unin ad ri jerowiwī. Ej ba bwe unin ad jerowiwī ej kōn an juon armej kipiliia (jab pokake). Wōn eo? Adam. Anij ej ba bwe kōn an Adam jerowiwī, jej ri jerowiwī. Etke jej jerowiwī? Kōnke e nana būruōd jān iien ad lotak.



Rom 3:23 Bwe otemjej raar jerowiwī im rej likjab jān aiboojoj an Anij.

Anij ej ba bwe armej otemjej rej jerowiwī im bwe ejjelok rū wānōk (Rom 3:10). Eḷañne ewor juon ajri me e jab ri jerowiwī, innām e bōd eoon kein.



Sam 51:5 Lo eṃōj kōṃanṃan eō ilo jab wānōk, im ilo jerowiwī jinō ear etaik eō.



Sam 58:3 Ro re nana re ruwamāejet jān loje; re jebwābwe jān iien aer lotak, im re kōnono riab ko.


Kein im Ebel raar bōdañ jemaer im lotak ilo jerowiwī, im āindein kwe im ña. Je jab erom ri jerowiwī ke jej jino in jerowiwī. Jej ri jerowiwī kadede jān iien ad lotak, im eñin unin ad jerowiwī. Juon piik ej ṃantin piik kōnke e juon piik. Jej jerowiwī kōnke jej ri jerowiwī. Āindein ilo biktoked. Anij ear kōṃanṃan kōj, bōtab jej nejin Setan.



1 Jon 3:10 Ro nejin Anij, im ro nejin tepiḷ, rej alikkar ilo men in: jabdewōt eo e jab kōṃṃan wānōk, e jab jān Anij, barāinwōt eo e jab yokwe jein im jaten.

Kōn men in, aolep armej me re lotak ilo laḷ in rej jān Adam, im rej jepel jān Anij.

Adam e jepel jān Anij



Aolep ro rej lotak jān Adam re jepel jān Anij

2. Anij ear jiroñ armej bwe ren katok ñan E.

Ejjeļok juon armej e maroñ kepaakļok Anij ilo e make. Jej aolep ri jerowiwu im Anij ej dike jerowiwu. Oņean jerowiwu mej. Ejjeļok juon men im je maroñ kōmmane bwe jen erre jān bōd ko ad. Anij e kōņaan bwe jen keememej men kein. Bōtab e kōņaan bwe jen barāinwōt keememej bwe Enaaj jilkin-tok juon Ri Kapit bwe En mej kōn jerowiwu ko ad. Ta eo im Ear kajerbale ñan kakememej armej ro jinoin tata kōn itok eo an Ri Lomōor eo?

Ear jiroñ er in bwe ren katok. Eņōj ad katak kōn an Jetan moņe Iv, im jaar ba men in: “Jetan ej moņoņō ñe armej rej kabuñ ñan Jijej.” Ijo wōt ke, men eo ej dike ej ñe rej kabuñ ekkar ñan mool. Ejjeļok tokjān ad kabuñ ñan Jijej ñe e bōd kilen ad kabuñ.

Kōn men in, Jetan e kōņaan bwe jen kabuñ ñan Jijej ilo jakkar.



Mark 7:7 A ejjeļok tokjān aer kabuñ ñan Eō, kōn aer katakin, kōn aer naan in katak kien ko an armej.

Anij ear kōnnaanōk Kein im Ebel ta eo rej aikuj in kōmmane bwe ren kabuñ ñan E. Ejjeļok men Adam, ak Iv, ak Kein, ak Ebel raar maroñ kōmmane bwe ren kepaak Anij. Raar jepel jān Anij, im oņean jerowiwu ta? Mej.


- * **Armej rej ri jerowiwu. Ej aikuj Anij bwe e jab maroñ make lomōoren e.**
- * **Anij e utiej jān aolep im Ej irooj ioon aolep men.**
- * **Armej re maroñ kepaak Anij ilo wāween an Anij ba wōt.**

Bōtab, ewor juon karōk im pepe an Anij bwe ren maroñ pād Ippān. Etke Anij ear kōmman men in? Kōn An yokwe er. Im men in, an wōn pepe? An Anij wōt.

- * **Anij ej kōnono ippān armej.**

E alikkar bwe Anij ear kōnnaanōk Adam im Iv ta eo rej aikuj in kōmmane bwe ren pād ippān, im jej ļōmņak bwe Adam im Iv raar kōmeļeļeik Kein im Ebel.

Anij ear ba ñan er bwe rej aikuj bōk juon sip āinwōt juon men in katok . Rej aikuj in man sip eo bwe bōtōktōken en tōorļok. Ak eļañne bōtōktōken mennin-mour e jab maroñ kōļļā oņean jerowiwu ko an armej (Hibru 10:4), innām etke Anij ear ba ren kōmman men in?



- Anij ear kōņaan bwe ren kememej bwe oņean jerowiwu mej.
- Anij ear kōņaan bwe ren jeļā bwe renaaj mej im eņtaan indeeo eļañne E jab lomōoren er.
- Eļañne raar errā ippān Anij bwe raar ri jerowiwu im ekkar bwe ren mej, im raar errā bwe Anij wōt E maroñ in lomōoren er jān mej indeeo, ren bōktok juon sip im man e, āinwōt an Anij kar jiroñ er.



* **Anij e tiljek, im E jab oktak.**

Emōj an Anij ba bwe oņean jerōwiwi mej, im Anij e jab oktak. E jab ba bwe je maroņ kōļļā oņean ad jerōwiwi kōn ad jar, kwaļok naan, jabawōt, jermal ñan Anij, ak kōjparok kien ko An.



Livitikōs 17:11 Bwe mour in kanniōk ej ilo bōtōktōkin, im Iar lewōj ñan koņ ioon lokatok eo bwe en kōmman kōllaajrak ñan ami, bwe bōtōktōk men eo ej kōmman kōllaajrak kōn mour.



Hibru 9:22 Im ilo kien eo rej karreo kōn bōtōktōk men ko otemjeļok, im elañņe ejjeļok katōrļok bōtōktōk innām ejjeļok jeorļok.

Wāween an Anij pepe bwe en wor lōmōor ñan armej ej kōn katōrļok bōtōktōk, im jej lo men in ilo aolepen Bible.

3. Katok eo an Kein.

* **Armej re maroņ kepaak Anij ilo wāween an Anij ba wōt.**




Jenesis 4:2,3 Im ear bar keotak Ebel, jatin. Im Ebel ri lale sip, a Kein ri kallib. Im tokālik, Kein ear bōktok men in joortak ñan Jeova, jān leen āne.

Ekkar ñan eoon in Kein ear ri kallib. Ear mōņōņō kōn keinnikan ko kōtaken. Ear lukkuun mōņōņō ke ej lo an men ko kōtaken jebar leen. Kein ear kabuņ ñan wōn? Anij. Kein ear tōmak ilo Anij ke? Aet. Bōtab, armej re jab mour ilaņ im pād ippān Anij kōn aer tōmak ilo Anij wōt.



Jemes 2:19 Kwōj tōmak bwe Anij e juon wōt; eņman wōt aņ kōmman. Tiņoņ raņ barāinwōt rej tōmak im wūdiddid.



Ekkar ñan eoon in, wōn rej tōmak ilo Anij? Tiņoņ raņ. Im rej ke mour? Re jab. Ad tōmak bwe ewor juon Anij e ban kōllaajrak kōj ñan Ippān. Oņean jerōwiwi ta? Mej.

4. Katok eo an Ebel.



Jenesis 4:4 Im barāinwōt Ebel ear bōktok jān ko moкта im jān ko re mātōk, jān bwijin kidu ko nejin. Im Jeova ear mōņōņō kake Ebel im joortak eo an.

Ebel ear juon shepherd (ri lale sip). Ilo iien an katok, ear katok kake juon sip. Etke ear katok kōn juon sip?

- Ebel ear errā ippān Anij bwe e juon ri jerōwiwi im ekkar bwe en mej.
- Ebel ear tōmak Anij ke Anij ear ba bwe wāween eo wōt ñan bōk joļok bōd ej bwe en tōrļok bōtōktōk.

- Ebel ear tōmak kallimur eo an Anij bwe Enaaj jilkintok juon Ri Lomoor.

5. Anij ear bōk katok eo an Ebel wōt.



Jenesis 4:4b,5 Im Jeova ear mōñōñō kake Ebel im joortak eo an; a kōn Kein, im joortak eo an, Ear jab buñbūruon. Im Kein ear kanooj illu, im e mejān jememe.

Etke Jeova ear jab buñ būruon kōn men in juurtak eo an Kein? Je lak lale Kein ear letok men ko remman tata iaan leen jikin kallib eo an. Barāinwōt ear tiljek kake an katok. E nana ke leen jikin kallib? E jab.

Etke Anij Ear jab bōk nuknuk bōlōk ko an Adam im Iv? Etke Ear julōki im bar kōmman aer nuknuk jān kilen kidu? Ilo ad katak Kallimur Mokta jej lo bwe an Ri Ju katok kōn sip ej jutak kōn Ri Kapit eo (Jijej Kūraj). Ke emōj an armej jerowiwī, Anij Ear kālōt wāween in ñan kakememej er kōn aer jerowiwī ñae Anij, kōn oñean jerowiwī, im kōn Ri Lomoor eo.


Ilo iien an armej ñwijite būruon kidu eo, men in ej kakememej er bwe oñean jerowiwī mej, kōnke e mej kidu eo. Barāinwōt ej kakememej er kōn kallimur eo kōn Ineen kōrā eo. Elmān? Kōnke ejjelok ruōn kidu eo. E jab mej kōn jerowiwī ko an make. Bōtab ej pinej jenkwān armej eo me ej katok kake. Jen keide men in katok eo an Kein ñan men in katok eo an Ebel.

Katok eo an Kein	Katok eo an Ebel
Ejjelok mej	Ewor mej
Ejjelok katōrlok bōtōktōk	Elōñ katōrlok bōtōktōk
E jab ekkar ñan wāween an Anij ba	Ekkar ñan wāween an Anij ba

Anij ear jab bōk Kein kōnke:

- Kein ear jab tōmak men eo Anij ear ba kōn bōtōktōk.
- Kein ear kajjioñ in make pukot kilen kepaak Anij im kabuñ ñan E.

Elōñ armej rej kajjioñ in kepaak Anij kōn jet men me rej kōmmani, im re jab kile bwe re jepel jān Anij, im ejjelok men re maroñ kōmmani ñan kōllaajrak er ñan ippān Anij.



6. Kein im Ebel Raar Jiṃor Kabuñ ñan Jeova



Jenesis 4:3 Im tokālik, Kein ear bōktok men in joortak ñan Jeova, jān leen āne.

Emōj ad lo bwe Kein ear kabuñ ñan Jeova. Innām etke Jeova ear jab buñ būruon kōn e? Ilo raan kein je kijoñ ba, “Aolep kabuñ rej kabuñ ñan Anij. Juon wōt Anij.” Meñe e oktak jidik tōmak ko an kaj-jojo kabuñ jān doon, jej lōmṃak rej aolep kabuñ ñan Jeova. Jej lōmṃak bwe rej aolep kabuñ būruon. E jiṃwe ke men in?

Ekwe jen lōmṃak kake jidik. Kein ear kabuñ ñan ekjab ke? Ear kabuñ ñan tiṃon ke? Jaab. Innām ear kabuñ ñan wōn? Ejjiṃwe! Ear kabuñ ñan Jeova. Im e lukkuun tiljek Kein ilo an kabuñ ñan Jeova! Innām etke Jeova ejab buñ būruon kōn e? Kōnke e bōd kilen an Kein kabuñ.

Elōñ rej lōmṃak bwe ñe juon armej ej kabuñ ñan Anij innām emṃan. E bōd men in. Juon iien Jijej ear kabōd Parisi ro kōn aer kabuñ ñan Anij.



Matu 15:9 A ejjelok tokjān aer kabuñ ñan Eō, ñe rej katakin, kōn naan in katak, kien ko an armej.

Etke Jeova ear jab buñ būruon kōn katok eo an Kein? Kōnke e bōd kilen an katok. Etke ejab buñ būruon Anij kōn an elōñ armej kabuñ ilo raan kein? Kōnke e bōd kilen aer kabuñ. Ñe e bōd kilen am kabuñ innām ejjelok tokjān am kabuñ. Ewi kilen kabuñ e jiṃwe?



Hibru 11:4 Kōn tōmak Ebel ear katok ñan Anij kōn men in katok emṃan jān eo an Kein, kōn eo ear jibadek kōnnaan kōn an wānōk, bwe Anij Ear kōnnaan kōn juurtak ko an; im leo e mej ej kōnono kōn e ñan iien in.

Jej kabuñ būruon Anij kōn tōmak. Eļaññe Kein ear tōmak Anij enaaj kar katok kōn sip āinwōt an Anij jiroñ e. Enaaj kar kōttāik e ñan Anij im tōmak wōt E ñan lōmṃoren. Jen āinwōt Ebel. Jen tōmak wōt mej eo an Jijej ñan kawānōk kōj.



Jerbal 4:12 Im mour ilo ejjelok bar juon; bwe ejjelok bar juon āt iuṃwin lañ, im letok ñan armej bwe jen mour ilo E.

Kajjitōk ko

1. Etke Anij ear ba bwe armej ren katok ñan E?
2. Kein ear kabuñ ñan wōn? Ear katok kōn ta?
3. Etke Anij ear jab bōk Kein im men in katok eo an?
4. Etke Anij ear mōṃōṃō kōn Ebel im katok eo an?
5. Etke jej jerōwiwi?
6. E jiṃwe ke aolep wāween kabuñ ñan Anij?
7. Ewi iaļ eo wōt ñan lōmṃor?